

Komisaun Ekonomia no Dezenvolvimentu

RELATÓRIU VIZITA FISKALIZASAUN IHA MUNISÍPIU COVALIMA

I. INTRODUSAUN

1.1. Enkuadramentu Legal

Komisaun Ekonomia no Dezenvolvimentu, Parlamentu Nasional hala’o vizita fiskalizasaun bazeia ba artº. 92º, artº. 95º, n.º 3 alínea e), kombinadu ho artº. 145º n.º 3) husi Konstituisaun RDTL, no mos bazeia ba artº. 35º alínea c), kominadu ho artº. 79º alínea f) husi Rejimento Parlamentu Nasional.

Vizita ne’e bazeia ba planu atividade ba tinan 2019 ne’ebi koalia kona-ba vizita lokal no mos bazeia ba deliberasaun ne’ebi komisaun foti iha loron 15 Maiu 2019 no iha loron ne’e kedas komisaun hato’o pedidu autorizasaun ba Presidente Parlamentu Nasional no tuir mai hetan despachu iha loron 16 Maiu 2019.

Haktuir ba despachu refere, iha loron 26-30 Junhu 2019, komisaun realiza vizita fiskalizasaun ba munisipíu Covalima ho intensaun atu hare no rona diretamente rezultadu husi implementasaun projeto sira iha munisípiu refere.

1.2. Area Fiskalizasaun

Delegasaun halo fiskalizasaun ba area ne’ebi mak kabe ba kompetensia Komisaun Ekonomia no Dezenvolvimentu, hanesan: MAP, SEFOPE, MTCI, Ambiente no Koperativa, maibe komisaun ba hare área sira ne’ebi identifika ona hanesan: Vizita sentru tratores, vizita fatin rai ai teka, vizita fatin demplot, vizita postu integradu iha mota Masin, vizita merkadu fronteira mota Masin, vizita plantasaun kaizus, vizita viveiros kaizus, vizita quarentena Salale no vizita plantasaun aikamili.

1.3. Métdou Fiskalizasaun

Métdou ne’ebi komisaun uza iha fiskalizasaun ne’e mak liu husi dialogu ho lideransa lokal sira liu husi reuniaun. Depois reuniaun membru komisaun ba terenu hodi halo observasaun direta ba konstrusaun no mos koalia direta ho populasaun sira. Depois observasaun komisaun reuniaun hodi halo avaliaun ba dadus ne’ebi iha molok aprova.

Komisaun Ekonomia no Dezenvolvimentu

1. Enkontru

Delegasaun hasoru malu ho prezidenete munisípiu Covalima Interinu, diretor Agrikultura no Peskas, diretor SEFOPE, vokal poin Ambiente no kordenador Regulasaun Komersiu Internu.

2. Observasaun direta

Hare projetu fiziku, koalia ho agrikultor sira no rona komunidade nia lamentasoens.

3. Análiza

Cross check dadus ne'ebé hetan husi vizita, liga ba ezekusaun orsamentu no dadus ne'ebé mai husi governu, hodi hatene kona ba efisiensia no efikasia ezekusaun orsamentu, atu hatene kona ba balansu entre despezas no beneficiariu sira, no atu sukat meta política kona ba retornu ekonómiku.

1.4. Objetivu Vizita

Objetivu husi vizita fiskalizasaun ne'e:

1. Atu hare efisiensia no efikasia iha ezekusaun orsamentu jeral estadu bazeia ba kumprimentu lei no kualidade obra;
2. Rejista no identifika problema ne'ebé iha, relasiona ho ezekusaun orsamentu (balansu ba beneficiariu sira no osan ne'ebé gasta);
3. Atu hare diretamente prosesu no progressu konstrusaun husi projetu no política implementasaun projetu.

1.5. Delegasaun

Delegasaun Komisaun D ne'ebé hola parte iha vizita fiskalizasaun ne'e kompostu husi deputadus, teknikus no motoristas hanesan tuir mai:

- | | |
|---------------------------------------|-----------------|
| 1. Deputada Virgínia Ana Belo | Xefe delegasaun |
| 2. Deputadu Ricardo Baptista | Membru |
| 3. Deputada Olinda Guterres | Membru |
| 4. Deputadu José Virgílio F. Ferreira | Membru |
| 5. Deputadu Antoninho Bianco | Membru |
| 6. Deputadu António do Santos ''55'' | Membru |
| 7. Deputadu Alexandrino C. da Cruz | Membru |
| 8. Deputada Regina Freitas | Membru |

Komisaun Ekonomia no Dezenvolvimentu

9. Teknikus no Motoristas

II. REZULTADU ENKONTRU

2.1. Informasaun husi administrasaun

Antes dezloka ba terenu komisaun hala'ó reuniaun ho Presidente Munisípiu Covalima Interinu no diretores linhas ministeriais hodi hetan informasaun jeral kona ba implementasaun projetu sira ne'ebé realiza iha munisípiu Covalima, liu-liu projeto sira ne'ebé kabe ba kompetensia Komisaun D no informasaun importante seluk.

Sorumutu entre delegasaun Komisaun D no loke ho liafuan bem vindu husi Presidente Munisípiu Interinu, señor Afonso N. Nahak, iha intrudusaun haktuir katak Parlamentu Nasional, liu husi Komisaun D iha kna'ar ida mak atu halo fiskalizasaun ba atividade saida deit mak implementa iha terenu liga ho orsamentu jeral estadu ne'ebé mak kada tinan Parlamentu Nasional aprova hodi aloka mai iha munisípiu.

Tuir mai presidente munisípiu fo sai kona ba diresaun municipal sira ne'ebé marka prezensa iha reuniaun ne'e mak hanesan: Diretor Agrikultura no Peskas, Diretor SEFOPE, Kordenador Regulasaun Komeriu Internu no Vokal Poin Ambiente.

Iha biban ne'e, presidente munisípiu relata mos assuntu balun hanesan rai que nudar problema sosial ida ne'ebé mak sai preokupasaun bo'ot, tanba iha munisípiu Covalima rai sira ne'ebé mak uluk abandonadu kuaze iha hotu ona nain, tanba liu husi projeto sukat rai husi SNC (Serviço Nacioanl Cadastro). Ne'e preokupasaun tanba governo precisa rai hodi halo dezenvolvimentu ruma, estadu tenki tau osan hodi halo kompensasaun.

Hare ba assuntu ida ne'e, parte munisípiu kordena ona ho DMTP (diresaun municipal terras no propriedade) hodi bele hare liu tan ba iha mapamentu ba rai ne'ebé mak durante ne'e seidauk iha nain no abandonadu hela mesmu que sukat ona husi SNC no seidauk implementa buat ruma ne'e konsidera estadu mak nain.

Hafoin rona tiha intervensaun husi presidente munisípiu, tuir mai deputadu Ricardo Baptista nudar viçe-presidente komisaun apresenta kona ba objetivu fiskalizasau iha munisípiu Covalima, ne'ebé mak atu rona no hare diretamente prosesu no rezultadu implementasaun orsamentu jeral estadu ne'ebé Parlamentu Nasional aprova kada tinan, liu-liu nia benefisiu ba komunidade em jeral, no mos hakarak

Komisaun Ekonomia no Dezenvolvimentu

rona problemas ou desafios saida mak kada diresaun sira enfrenta durante ne'e, atu nune'e komisaun bele kanaliza ba iha ministériu kompetente hodi bele konsidera no tau atensaun.

Ho nune'e, tuir mai presidente munisípiu fo tempu direta ba iha diresaun munisipal sira hodi relata atividade ne'ebe mak kada diresaun hala'o iha munisípiu Covalima, nune'e mos difikuldade saida mak hasoru hanesan tuir mai:

2.1.1. Diresaun Munisipal Agrikultura no Peskas

Diretor MAP munisípiu Covalima, señor Zeferino A. Gonsalves imforma katak diresaun munisipal agrikultura no peskas iha departementu hat hanesan departementu agrikultura i holtikultura, departementu pekuaria, departementu floresta, plantas i industriais no departemetu planu i finansas.

Total forsa de trabalhu ne'ebe iha hamutuk ema nain 141, kompostu husi permanente nain 93 no ajente nain 48. Husi numeru ida ne'e, total extensionista iha nain 38 no tratoristas iha nain 43, guarda floresta iha nain 7 no tekniku veternariu iha nain 1 mak kobre hotu ba iha postu administrativu hitu iha munisípiu Covalima. Kona ba tekniku extensionista precisa kordenador ida iha kada postu administrativu hodi bele kordena no jere atividade sira ne'ebe mak extensionista implementa iha suku sira, no guarda floresta precisa aumenta, tanba area potensialidade ba floresta luan tebes.

Kona ba komoditi batar no harre, tuir imformasaun ne'ebe hato'o husi diretor MAP katak area kultivasaun ba komoditi batar iha tinan kotuk tuir trajetu ne'ebe iha atu kuda to'o 4000 hektares, maibe kuda deit 3,968.80 hektares no produsaun ne'ebe hetan hamutuk 11.810.81 toneladas kuaze suku hotu hetan. Area kultivasaun ba komoditi harre tuir projesaun husi nasional ba munisípiu Covalima atu kuda to'o 1.520 hektareas, maibe konsege kuda deit 1.382 hektares no nia rezultadu produsaun seidauk bele hatene, tanba sei iha hela presesu kolheta.

Servisu departementu agrikulturan no hortikultura ida mak apoiu ba fila rai agrikulor sira nian ne'ebe lao nafatin, iha epoka dahuluk hahu husi fulan outubru to'o janeiru 2019 konsege fila rai hamutuk 215 hektares husi total ne'ebe beneficiarius hamutuk 415. Kona ba apoiu mina gratuita ba fila rai kuaze tinan rua ona la iha no agrikultor sira mak tau rasik mina ba trator hodi fila rai. Husi kontribuisaun agrikultor sira mak rezulta iha tinan ida ba kotuk ne'e produsaun batar sae maka'as.

Komisaun Ekonomia no Dezenvolvimentu

Distribuisaun fini kada tinan ba agrikultor sira hanesan batar distribui 10-18 toneladas no harre distribui 10-12 toneladas, maibe iha tinan rua liu ba ne'e distribuisaun fini menus, tanba lao deit ho orsamentu duodecimo, nune'e fini batar distribui deit tonelas 2 no fini harre distribui deit 2.5 toneladas.

Total trator ne'ebe iha hamutuk 28 unidades no 5 unidades mak at todan ne'ebe tama ona ba iha patrimonia estadu hodi prosesu ba leilaun, maibe to'o agora seidauk iha ema ruma mak ba hare, no hela 23 unidades, maibe iha 18 unidades mak halo operasaun no 5 unidades mak at kama'an. Iha tinan kotuk husi nasional aloka tan trator bo'ot 2 ne'ebe mak destaka iha irigasaun Oebaba.

Orsamentu ba manutensaun trator kada tinan aloka \$2000 dolares amerikanu hodi atende ba troka oleo, troka aqui, troka pessa, troka filtru no porka. Orsamentu ida ne'e aloka ona munisípiu, maibe tenki liu husi prosesu tenderizasaun no empresa ne'ebe manan mak bele mai halo manutensaun, ho nune'e kuaze fulan nen ona mak seiduk halo manutensaun ba trator sira.

Departementu florestas, plantas no industriais agora dadaun implementa hela viveiros komunitaria no hala'o hela atividade manutensaun aikamili ho total 6 hektares. Orsamentu ne'ebe preve ba programa ida ne'e kada tinan \$2500 dolares amerikanu. Nune'e mos facilita licenciamentu ba koa ai husi komunidade no empresa sira. Iha mos programa kona ba expansaun ba area kaizus iha postu administrativu Tilomar ba iha suku Biseu hamutuk 4 hektares no suku Maudebo hamutuk 10 hektares, no iha tinan rua ba kotuk kuda bua hamutuk 2 hektares iha suku Dato Rua, postu administrativu Fohorem.

Servisu husi departementu pekuaria mak kona ba prosesu vasinasaun no tratamento ba animal lao tuir orariu ne'ebe iha kada fulan tolu, maibe oras ne'e dadaun atividade ne'e sei paradu tanba aimoruk sei iha hela prosesu tenderizasaun iha nasional.

Irigasaun Oebaba kobre ba natar hamutuk 2.263 hektares, maibe halo efetivu lolos iha 708 hektares no irigasaun sira seluk hanesan iha Salele porvolta de 87 hektares labele produs harre, tanba be'e mota sira maran hotu no iha Salele Bot mak iha be'e ne'ebe naton, maibe to'o iha fulan outubru debit be'e la suficiente hodi fornece be'e ba natar 58 hektares, ho nune'e mak natar fatin lobuk ida uza fali ba kuda batar no foremungu.

Irigasaun Maukola intake bo'ot ida desde tempu Indonesia nian, maibe la funsiona no be'e mak kanaliza fali ba iha suku Tasili hodi hala'o atividade kultivasaun natar, no iha suku Raimea iha potensia

Komisaun Ekonomia no Dezenvolvimentu

natar kuaze 80 hektares, maibe kuandu halo depende ba udan ben, nune'e mos Suai Loron iha potensia natar kuaze 283 hektares depende hotu ba udan ben.

Kona ba potensia aikamili ne'ebe iha hanesan iha Tilomar hamutuk 20 hektares, no iha governu dahuluk estabelece 6 hektares ne'ebe mak bo'ot hotu ona no iha tinan tolu liu ba kuda tan 14 hektares no kada tinan preve orsamentu \$1500 dolares amerikanu hodi halo manutensaun. Preokupasaun mak seidauk iha postu permanente ba guarda floresta iha fatin neba no iha tinan ne'e atu estabelece tan 50 hektares iha Zumalai.

Produsaun café iha munisípiu Covalima iha postu administrativu hat hanesan Fohorem, Fatumea Maucatar no Fatululi ladun iha atensaun husi agrikultor sira hodi halo manutensaun. Assosiasaun produs fini komersial iha munisípiu Covalima iha assosiasaun 4 hanesan assosiasaun harre iha 2, assosiasaun batar iha 1 no assosiasaun forerai iha 1.

Mekanismu distribuisaun fini durante ne'e lao hela tanba misiteriu fo fiar ba assosiasaun sira ne'e hodi produs fini no parte ministeriu akompanhia hodi fo assistensia teknika to'o iha kolheta no armazenamentu, hafoin mak fini sira ne'e ministeriu sosa hodi distribui ba agrikultor sira hodi kuda.

Kona ba atividade demonstrasaun (demplot) iha munisípiu Covalima kuaze implementa hotu iha suku 30, maibe ho varidade ne'ebe la hanesan depende ba potensialidade rai, iha suku balun halo demonstrasaun forekeli, balun foremungu no suku balun foka ba iha hortikultura.

Ai sira ne'ebe mak afeitadu husi implementasaun projetu suplai base hanesan auto estrada no airoportu, parte diresaun MAP nian mak halo identifikasi saun no rekolhamentu dadus tekniku, hafoin mak kompanhia koa no atu prosesu ba iha leilaun, tanba iha tempu neba entrega tiha ona kompetensia ba iha ministeriu Finansas mak prosesa ba leilaun no anunsiu ona ba publiku no iha kompanhia sira mai hare, maibe quotasaun presu mak la kondisau fisiku ai sira, tanba ai sira ne'e iha balun at ona, tanba rai hela deit iha liur kuaze tinan hira ona hodi kona loron no udan.

Kona ba programa kuda batar ainaruk (sorgum) husi sekretariu estadu koperativa iha munisípiu Covalima, diretor MAP haktuir katak sira mai fo hatene, maibe la iha kordenasaun ne'ebe diak, hanesan iha fulan kotuk liu ba diresaun MAP hetan konvite ba partisipa iha atividade kuda batar ainaruk iha Casabau, maibe la iha konhesimentu ba iha autoridade lokal hanesan xefe suku no administrador postu.

Komisaun Ekonomia no Dezenvolvimentu

Programa ida ne'e diak, maibe tenki iha kordenasaun diak ho diresaun agrikultura hodi implementa atu nune'e bele fo resultadu ne'ebe diak, tanba nain ba programa ida ne'e mak diresaun agrikultura, hahu husi preparasaun rai, kuda no kolheta no parte koperativa simu deit nia resultadu.

Diretor akresenta liu tan katak komoditi batar ainaruk ne'e iha Covalima iha tempu avo sira nian prepara ba asegura siguransa aihan, maibe iha tempu ida agora ne'e produsaun batar ne'e surplus tiha ona no la iha merkadu, tanba kuaze kada familia sira iha hotu batar ne'ebe mak sira fa'an kada saku 25 kg ho folin \$3.50 centavos no mai fali ho programa kuda batar sorgum ne'ebe mak prospek ba merkadu ne'e susar tebes ho tempu ida agora, maibe parte diresaun agrikultura nian prontu atu fo assistensia teknika naran katak iha kordenasaun ne'ebe diak.

Peskas iha munisípiu Covalima iha grupus peskadores hamutuk 16 grupus no parte diresaun fo assistensia teknika hodi monta motor jonson bo'ot ida hodi bele sukat produsaun ne'ebe kada loron peskador sira hetan. Alen de ne'e mos iha kolam ikan iha postu administrativu sira hanesan Fohorem, Tilocmar no Suai.

Kona ba hortikultura iha postu administrativu hat hanesan Fatululi, Fatumea, Fohorem no Suai vila iha area Salele ne'ebe mak potensial mos ba hortikultura.

2.1.2. Diresaun Municipal SEFOPE

Tuir imformasaun ne'ebe hato'o husi diretor SEFOPE, señor Gabriel Gusmão katak politika SEFOPE nian mak hare liu ba iha formasaun professional, auto empregu no relasaun trabalhu.

Iha munisípiu Covalima iha sentru formasaun rua ne'ebe mak hetan akreditasaun husi governu hanesan sentru formasaun Canosa ne'ebe implementa husi madre sira no sentru formasaun pradet Salele.

Iha area formasaun professional, hahu husi tinan 2015 to'o 2018 juventude sira ne'ebe formandu husi sentru rua ne'e hamutuk 266 pessoas, no iha 100 ital mak asesu ona ba servisu. Juventude ne'ebe registradu ba buka formasaun iha tinan ne'e hamutuk 93 pessoas.

Iha area empregu, iha grupu beneficiariu hamutuk 13 grupus ne'ebe mak atividade lao hela to'o mai agora hanesan grupu oficina, grupu hortikultura, grupu dulas hare no seluk tan. Iha area relasaun trabalhu atende ba iha buat rua, ida hare ba iha trabalhador sira ne'ebe mak hetan violasaun ba sira nia

Komisaun Ekonomia no Dezenvolvimentu

direitu no ida fali mak servisu inspesaun do trabalhu ne'ebe decreta iha lei nº. 19/2010, hodi fo kompetensia ba inspetor sira hodi halo inspesaun ba iha empresa sira.

Inspesaun ne'ebe hala'o hahu husi tinan 2015 to'o 2018 pena de multa ne'ebe aplika ba empresa sira ne'ebe mak viola lei do trabalhu nº. 4/2012 ho montante orsamentu \$83.940 dolares amerikanu mak empresa sira selu ona ba estadu no iha tinan 2019, hahu husi fulan janeiru to'o junhu kontinua aplika pena de multa ba empresa sira no konsege hatama tan receita ba estadu porvolta de \$11.000 dolares amerikanu.

Tuir dadus ne'ebe iha total juventude ne'ebe servisu tiha ona iha rai liur hanesan Coreia do Sul iha 85 pessoas no Australia iha 35 pessaos, no juventude ne'ebe foin registradu atu ba servisu iha Australia ho total 1.545 pessoas, hafoin halo tiha selesaun ne'ebe mak passa iha 1.325 pessaos hodi prepara ba teste fisiku no teste eskrita.

Juventude sira ne'ebe formandus husi sentru formasaun rua refere hanesan iha area hospitalidade nian kuaze barak mak servisu ona iha restorante sira iha Covalima no Dili.

Hafoin tuir mai diretor relata mos dasafios ka problemas ne'ebe mak hasoru durante ne'e mak hanesan: menus facilidade hanesan transporte; orsamentu operasional kuaze tinan rua ona la iha; falta equipamento online ba sistema produs kartaun evidencia; no edefisiu SEFOPE hetan estragus husi desastre naturais iha fulan abril 2017 to'o agora seidauk hadia no kuandu tempu udan difikulta tebes servisu.

2.1.3. Diresaun Komersiu Internu

Tuir imformasaun husi señor Vitorino da Silva, nudar koredenador ba diresaun ida ne'e katak Ministeriu Turismu, Comersiu no Industria iha munisípiu Covalima iha diresaun tolu mak existe hanesan diresaun regulasaun komersiu, diresaun komersiu internu no diresaun comersiu externu.

Diresaun regulasaun komersiu nia atividade mak kontrola presu ne'ebe mak negociante sira implementa iha munisípiu Covalima. Atividade ne'ebe hala'o husi diresaun comersiu internu mak kontrola ba merkadu iha munisipu ba to'o postu administrativu sira, no kondisaun fisika merkadu sira ne'e grave liu, nune'e mos kontrola ba sasan tama no sai.

Komisaun Ekonomia no Dezenvolvimentu

Kordenador ne'e mos relata liu tan katak diresaun tolu ne'e to'o agora seidauk iha poder atu hola desijaun ruma, tanba seidauk iha delegasaun kompetensia no orsamentu operasional mos sei sentraliza hotu iha nasional hodi difikulta tebes servisu iha terenu.

Kona ba merkadu antiga ne'ebe lokaliza iha Debus nia kondisaun la suficiente ona hodi akumula tan negociantes sira, tan ne'e mak atu muda negociantes balun ba iha merkadu foun, maibe iha merkadu foun ne'e mos uma/fatin ba negociantes sira atu fa'an sasan mak la suficiente, ho nune'e mak iha merkadu foun ne'e semana ida loke bazar dala ida deit iha loron sabadu no loron sira seluk kontinua nafatin iha merkadu tuan.

Merkadu foun ne'e mos sei falta hela buat balun no precisa hadia no konstrui hanesan estrada tama iha maibe klot no estrada sai mak la iha, la iha moru haleu, eletricidade la iha no saneamento sira ne'ebe uluk iha tiha ona maibe estragus hotu, no munisípiu tau ona iha planu orsamentu 2020 nian hodi hadia.

2.1.4. Diresaun Ambiente

Vokal poin ambiente, señor Mauel A. do Santos informa katak, diresaun ambiente iha munisípiu Covalima desde destaka to'o agora la iha kompetensia atu hola desizaun ruma, tanba seidauk iha delegasaun kompetensia, maibe servisu ne'ebe hala'o mak monitorizasaun no kordenasaun servisu ho liña ministeriu sira.

Representante ne'e imforma mos kestaun balun ne'ebe sai nudar desafiu ba iha servisu lor-loron mak hanesan:

- Menus funzionariu, iha deit nain 4 kompostu husi permanente nain 3 no kontratadu nain 1 no oinsa mak bele responde ba to'o iha area rural sira;
- Facilidade hanesan motorizada iha 2, maibe kondisaun at hotu no durante ne'e uza deit motorizada privadu hodi hala'o servisu;
- Orsamentu ba manutensaun limitadu no sentralizadu iha nasional;
- La iha fatin lixeira permanente hodi nune'e lixu soe/fakar arbiru deit iha fatin publiku.

Iha parte seluk representante ne'e relata mos assuntu balun ne'ebe sai preokupasaun bo'ot iha munisípiu Covalima, mak liu-liu impaktu husi implementasaun auto estrada ne'ebe mak halo hodi

Komisaun Ekonomia no Dezenvolvimentu

ko/ke'e rai lobuk, maibe to'o agora seidauk kuda ai ruma hodi bele proteje hikas fali rai sira ne'e husi desastre naturais.



Enkontru ho presidente munisípiu interinu ho representantes linhas ministeriais, iha salaun administrasaun munisípiu Covalima

III. REZULTADU VIZITA TERENU

3.1. Vizita Sentru Tratores

Iha vizita dahuluk, delegasaun ba vizita sentru tratores ne'ebe lokaliza iha aldeia Sanfu, suku Kamanasa. Tuir imformasaun ne'ebe hato'o husi diretor MAP munisípiu Covalima katak total tratores ne'ebe iha hamutuk 30 unidades. Husi total ne'e, iha 20 unidades mak diak hodi halo hela operasaun, 5 unidades at kama'an no 5 unidades mak at todan, ne'ebe mak entrega ona ba iha patrimonia estadu hodi prosesu ba leilaun.

Orsamentu ba manutensaun kada tinan aloka \$2.000 dolares amerikanu, ne'ebe atende deit ba manutensaun ki'ik hanesan troka oleo, troka filtru, troka pessa, troka porka, troka aqui no seluk tan, maibe orsamentu ida ne'e la suficiente. Orsamentu manutensaun ba tinan ida ne'e aloka ona liu husi munisípiu no seidauk bele exekuta, tanba sei iha hela prosesu aprovizacionamentu.

Kona ba manutensaun/reparasaun ba trator sira ne'ebe at todan, ne'e sentraliza iha nasional mak prepara prosesu aprovizacionamentu hodi loke tenderizasaun, hafoin kompanhia ne'ebe manan mak hadia.

Komisaun Ekonomia no Dezenvolvimentu



Vizita sentru tratores, iha aldeia Sanfu, suku Kamanasa, postu administrativu Suai

3.2. Vizita fatin rai aiteka

Delegasaun ba vizita fatin rai aiteka maran ne'ebe lokaliza iha aldeia Sanfu, suku Kamanasa. Tuir imformasaun ne'ebe hato'o husi diretor MAP katak, ai ho total kuaze 100 pes kubiku, ne'ebe mak tesi/koa sai tiha hodi halo auto estrada. Ai hirak ne'e desde lori mai mak rai hela iha fatin ne'e.

Tuir observasaun katak kondisaun fisiku ai hirak ne'e, maioria kuaze at/dodok hotu, tanba butuk hela deit iha liur hodi kona loron no udan, maibe iha biban ne'e delegasaun konfirma ho diretor MAP munisípiu, tuir informasaun ne'ebe hato'o katak prosesu leilaun ne'e kabe ba iha kompetensia ministeriu Finansas no parte diresaun munisipal agrikultura nian mak halo identifikasihafoin fo autorizasaun ba kompanhia hodi koa.



Vizita fatin rai aiteka maran, iha aldeia Sanfu, suku Kamanasa, postu administrativu Suai

3.3. Vizita fatin implementasaun atividade demonstrasaun foremungu

Delegasaun kontinua ba vizita fatin implementasaun atividade demonstrasaun (demplot), ne'ebe lokaliza iha aldeia Sanfu, suku Kamanasa. Tuir imformasaun ne'ebe hato'o husi diretor MAP munisípiu

Komisaun Ekonomia no Dezenvolvimentu

Covalima katak, atividade demonstrasaun iha fatin ida ne'e foka liu ba iha kuda foremungu, ne'ebe foin mak kuda semana tolu liu ba.

Tuir observasaun katak atividade demonstrasaun iha fatin refere hatudu resultadu ne'ebe diak, tanba foremungu hirak ne'e moris hotu hanesan hatudu iha imajem kraik ne'e.



Vizita fatin demplot foremungu, iha aldeia Sanfu, suku Kamanasa, postu administrativu Suai

3.4. Vizita postu integradu mota Masin

Delegasaun ba vizita postu integradu mota masin. Iha vizita ne'e, delegasaun dada lia ho responsavel grupu no tuir informasaun ne'ebe hato'o katak atividade ne'ebe hala'o loro-loron mak fo atendementu ba ema tama no sai, iha fronteira, kada loron bele atende 40 to'o 50 pessoas, inklui passa revista ba sasan sira ne'ebe mak lori. Responsavel ne'e informa liu tan katak problema ne'ebe sira emfrenta mak menus rekursus humanus, tanba pessoal ne'ebe iha hamutuk nain 4 no dificil tebes kada loron atende ema tama no sai ho kuantidade hanesan temi ona ne'e.

Iha biban ida ne'e responsavel refere hato'o mos katak, agora loke tan ona postu rua, iha Fatumea no Fatululi, maibe seidauk iha pessoal ruma iha neba, nune'e mos airoporportu internasional Kay Rala Xanana Gusmão seidauk iha pessoal ruma kuandu funsiona ho diak precisa tan pessoal, tan ne'e husu atu aumenta tan pessoal hodi nune'e bele koloka ba iha fatin sira refere.

Komisaun Ekonomia no Dezenvolvimentu



Vizita postu integradu mota Masin

3.5. Vizita merkadu fronteira Salele

Delegasaun ba vizita merkadu fronteira Salele. Tuir informasaun ne'ebe hato'o husi koordenador MTCI katak merkadu ne'e depois konstrusaun iha tinan 2012 to'o mai agora la utiliza husi populasaun sira hodi fa'an sasan, tanba be'e la iha, saneamentu hanesan haris fatin no sentina la iha.

Tuir observasaun katak, merkadu ne'e hanesan uma/fatin ba fa'an sasan iha duni, maibe seidauk iha populasaun ka empresa ruma mak utiliza hodi fa'an sasan, no iha uma/fatin ida mak populasaun sira uza fali hanesan uma hela fatin hodi nune'e fa'an sasan balun hanesan bebidas, inklui sasan sira seluk, maibe kuaze maioria mak abandonadu no dut mak moris hadulas hela.

Kordenador ne'e haktuir liu tan katak merkadu ne'e depois konstrusaun ministeriu responsavel entrega tiha kendas ba administrasaun munisípiu mak tau matan hodi halo jestaun, maibe realidade mak to'o mai agora seidauk utiliza lolos fatin ne'e husi ema ruma hodi fa'an sasan.



Vizita merkadu fronteira Salele

Komisaun Ekonomia no Dezenvolvimentu

3.6. Vizita fatin plantasaun kaizus

Delegasaun ba vizita fatin plantasaun kaizus ne'ebe lokaliza iha Salele, suku Biseu. Tuir imformasaun ne'ebe hato'o husi nain ba plantasaun katak atividade ida ne'e hahu iha tina 2016 ho total area plantasaun hamutuk 4 hektares ne'ebe mak kuaze moris hotu.

Iha biban ida ne'e, diretor MAP munisípiu Covalima hato'o katak ai fuan ida ne'e nia presu iha merkadu kada killu \$1.00 dolar, tuir kalkulasaun ne'ebe iha katak hun ida bele hetan 15 to'o 30 kg (killu grama



Vizita fatin plantasaun kaizus, iha Salele

3.7. Vizita fatin quarentina

Delegasaun ba vizita fatin quarentina ne'ebe lokaliza iha Salele Bo'ot, suku Maudemo. Iha vizita ne'e delegasaun hare katak fatin ne'e abandonadu hela no seidauk funsiona, alende ne'e delegasaun hare mos katak fatin ne'e dok husi estrada kuaze 100 metrus no la iha estrada ne'ebe mak espesifika ba iha fatin refere.

Tuir imformasaun husi deretor MAP munisípiu Covalima katak, uma/fatin ida ne'e konstrui iha tinan 2014, no tuir lolos iha tinan hirak liu ba kotuk hahu funsiona atividade iha fatin ne'e, maibe iha altura neba iha exportasaun karau husi ne'e ba NTT, maibe iha neba klaim fali dehan karau sira ne'e sira nian, entaun governu sentral iha Jakarta deside hapara tiha, no atu reativa fali atividade ida ne'e governu husi parte rua tenki tur hamutuk hodi resolve tiha, hafoin mak bele kontinua fali atividade ida ne'e.

Komisaun Ekonomia no Dezenvolvimentu

Iha parte seluk, delegasaun nota mos katak fisikamente uma quarentina ne'e diak hela, maibe diresaun kompetente precisa tau matan hodi ema labele estraga no tenki halo limpeza atu nune'e bele mos hela deit, tanba realidade dut mak moris hadulas hela.



Vizita quarentina Salele Bot

3.8. Vizita viveiros kaizus

Delegasaun ba vizita viveirus kaizus ne'ebe lokaliza iha aldeia Aioan, suku Lalawan, postu administrativu Tilomar. Iha vizita ne'e delegasaun hare katak foin mak hahu halo viveiros, no tuir imformasaun ne'ebe hato'o husi responsavel grupu katak atividade ne'e implementa mai husi grupu ida ho naran Ainaruk. Iha grupu ne'e kompostu husi ema nain sanulu, kada ema ida prepara viveiros ba hektare ida, ne'ebe koresponde 1.560 pes. Orsamentu ne'ebe aloka hodi apoiu ba programa refere ho montante \$2.730 dolares amerikanu.



Vizita fatin viveiros kaizus, iha aldeia Aioan, suku Lalawan, postu administrativu Tilomar

Komisaun Ekonomia no Dezenvolvimentu

3.9. Vizita fatin plantasaun aikamili

Iha vizita ikus nian, delegasaun ba hare fatin plantasaun aikamili ne'ebe lokaliza iha area suku Maudemo. Iha vizita ne'e diretor MAP haktuir katak plantasaun aikamili iha fatin ida ne'e hahu iha 2004 ho total area plantasaun 6 hektares no iha fali tinan 2016 mak kuda iha parte sorin neba ho total area plantasaun 14 hektares. Iha biban ne'e delegasaun hare katak aikamili hirak ne'e maioria mak moris no agrikultor sira halo hela manutensaun hanesan hatudu iha imagem iha kraik ne'e.



Vizita plantasaun aikamili, iha Salele

3.10. Vizita kanal irigasaun iha Tafara

Delegasaun ba vizita kanal irigasaun iha Tafara. Iha vizita ne'e hare'e katak governu seidauk konstrui kanal irigasaun foun rumा iha fatin ne'e, no agrikultor sira halo manual deit hodi be'e halai ba natar sira iha Suai Loro. Agrikultor sira iha fatin refere imforma katak utilizasaun be'e husi mota ne'e iha deit tempu udan no iha tempu bailoron la bele utiliza tanba be'e maran.



Vizita irrigasaun manual iha mota Tafara

Komisaun Ekonomia no Dezenvolvimentu

3.11. Vizita fatin peskador iha Suai Loro

Delegasaun ba vizita fatin peskador sira iha Suai Loron. Tuir imformasaun husi peskador sira katak atividade peska lao hela lor-loron, maibe difikuldade ne'ebé sira imfrenta mak ro'o peska ne'ebé sira uza kondisaun ki'ik no labele tula ikan barak, iha parte seluk sira bele kaer ikan barak, maibe necessidade sosa menus, nune'e ikan barak mak estraga deit. Tan ne'e sira husu ba governu atu apoiu material hanesan konselador hodi nune'e bele konserva ikan, kuandu sosa la hotu. Alende ne'e sira mos husu apoiu ro'o peska bo'ot hodi nune'e sira bele halo peska ba to'o tasi klaran hodi bele kaer ikan barak.

Iha biban ne'e mos sira imforma katak iha governu da hat sira hetan apoiu ro'o peska hamutuk 6 unidades, maibe ro'o hirak ne'e at hotu, no durante ne'e sira uza rasik sira nia ro'o hodi halo peska maibe kondisaun la diak no ki'ik.



Vizita fatin peskador iha Suai Loro

3.12. Vizita fatin turismo iha Suai Loro

Delegasaun ba vizita fatin turismu iha Suai Loro. Iha vizita ne'e, delegasaun dada lia ho xefe aldeia Lo'o, señor Jeferino da Conceição Pinto imforma katak fatin ne'e iha ona uma baraka oan ne'ebé hari'i iha tempu setimu governu, liu husi ineciativa viçe-ministru Komersiu no Indústria, maibe sei falta haris fatin sentina no be'e mos, nune'e iha governu atual mai hare no identifika ona, maibe seidauk hatene baihira los mak implementa.

Komisaun Ekonomia no Dezenvolvimentu



Vizita uma baraka iha Suai Loro

Hafoin delegasaun kontinua ba vizita fatin ne'ebe mak kompanhia Timor Resourch atu utiliza ba hari'i armagem, iha Suai Loro. Iha vizita ne'e, tuir imformasaun ne'ebe hato'o husi lian nain iha fatin refere katak rai ne'e rai kultura, ne'ebe mak populasaun tomak suku Suai Loro nian, tanba liu husi fatin ida ne'e mak lia nain sira ba hamulak hodi husu udan ben no seluk tan, maibe kompanhia mai la iha kordenasaun diak ho autoridade lokal no lia nain sira. Lia nain ne'e haktuir liu tan katak sira nia parte laos atu impede dezenvolvimentu no sira disponível hodi oferece fatin seluk ba kompanhia Timor Resourch hodi hari'i armagem, maibe kompanhia la kohi hodi kontinua dada haleu tiha arame kuaze 6 hektares.

Tuir observasaun delegasaun nian los duni katak kompanhia dada haleu ona arame ba iha fatin refere hanesan hatudu iha imajem kraik ne'e.



Vizita fatin ne'ebe kompanhia Timor Resourch atu hari'i armajem, iha Suai Loro

Komisaun Ekonomia no Dezenvolvimentu

IV. KONKLUZAUN NO REKOMENDASAUN

a. Konkluaun

Iha fiskalizasaun ne'e, komisaun hasai konluzaun hanesan tuir mai ne'e:

1. Natar sira iha Raimea, Suai Tasi no Salele, kuandu halo depende ba uda ben no iha tempu bailoron labele halo;
2. Tratores ne'ebe destakadu iha munisípiu Covalima ho total 30 unidades. Husi total ne'e, iha 5 unidades mak at todan, at kama'an iha 5 unidades no iha 20 unidades mak kondisaun diak;
3. Ai teka sira ne'ebe koa/tesi hodi halo dezenvolvimentu auto estrada kuaze 100 metros kubiku halo ona leilaun, maibe presu mak la tuir kondisaun fisiku ai nian, tanba balun at/dodok tiha ona;
4. Tekniku veternaria iha pessoal ida deit, dificil tebes atu kobre ba postu administrativu hotu iha munisípiu Covalima;
5. Produsaun batar tinan ida ne'e sae maka'as, maibe necessidade merkadu mak menus;
6. Quarentina Salele seidauk funsiona, tanba governu husi parte rua, Timor Leste ho Indonesia seidauk iha konkordansia hodi exporta no importa karau;
7. Peskador sira iha Suai Loro sira nia atividade peska lao hela, maibe difikuldade ne'ebe sira imfrenta mak ro'o peska ne'ebe sira uza kondisaun ki'ik no labele tula ikan barak, iha parte seluk sira bele kaer ikan barak, maibe necessidade sosa menus, nune'e ikan barak mak estraga deit;
8. Pessoal iha postu integradu mota Masin sei menus, tanba iha deit pessoal nain 4 ne'ebe mak atu kobre hotu ba postu integradu Fatumea no Fatululi;
9. Iha munisípiu Covalima iha ona sentru formasaun rua mak hetan akreditasaun hodi fo formasaun ba joven sira, iha area hospitalidade, Carpentaria no administrasaun;
10. Diresaun SEFOPE sei emfrenta hela problema hanesan menus transporte, la iha orsamentu operasional durante tinan rua ona, no edefisiu ne'ebe hetan estragus iha tinan 2017 to'o agora seidauk hadia;
11. Problema ambiental, liu-liu liga ho projetu dezenvolvimentu auto estrada, ne'ebe mak ke'e/ko ari lobuk ida, maibe to'o agora seidauk kuda ai oan ruma hodi poteze hikas fali rai sira ne'e;
12. Programa kuda batar ainaruk (sorgum) ne'ebe implementa husi sekretariu estadu koperativa iha munisípiu Covalima sei la hatudu resultadu ne'ebe diak, tanba la iha kordenasaun ne'ebe diak ho diresaun munisiapl agrikultura, nune'e mos la iha konhesimentu ba iha autoridade lokal;

Komisaun Ekonomia no Dezenvolvimentu

13. Merkadu fronteira mota Masin seidauk utiliza husi negociante sira hodi fa'an sasan no husik abandonadu hela, nune'e dut mak moris haleu;
14. Merkadu foun iha munisipiu Covalima seidauk utiliza husi vendedor sira hodi fa'an sasan, tanba sei falta facilidade balun hanesan saneamentu, electricidade, no estrada tama no sai;
15. Rai iha munisípiu Covalima ne'ebe konsidera abandonadu, maibe agora iha hotu ona nain tanba liu husi projetu sukat rai husi SNC (Serviço Nacional Cadastro), nune'e ba oin governu atu halo dezenvolvimentu estadu tenki halo kompensaun.
16. Kompanhia Timor Resourch, tuir planu atu hari i armagem iha Suai Loro hodi utiliza rai hamutuk hektares 6 no kompanhia dada haleu ona arame, maibe populasaun iha fatin refere la konkorda, tanba rai ne'e rai kultura ne'ebe mak pertensa ba populasaun tomak iha suku Suai Loro, no wainhira atu halo cerimónia ritual ruma hanesan ba husu udan no cerimónia ritual seluk mak ba iha fatin refere;
17. Fatin turismu iha Suai Loro halo ona uma baraka oan balun hodi komunidade sira utiliza ba fa'an aihan sira hanesan katupa, ikan no seluk tan, maibe sei falta saneamentu;

b. Rekomendasau

Komisaun hato'o nia rekomendasau hanesan tuir mai ne'e:

Ministeriu Agrikultura no Peskas

1. Rekomenda ba ministériu, ba futuru tau iha planu orsamentu hodi konstrui barajem ba be'e, atu nune'e iha tempu bailoron mos bele halai natar, hanesan natar lobuk ida iha Raimea, Salele no Suai Tasi ne'ebe kuandu halai natar depende ba uda ben;
2. Rekomenda ba ministériu, atu iha politika ne'ebe diak ba oin kona ba tratores;
3. Rekomenda ba ministériu atu revê fali presu ba ai teka hirak ne'e tuir kondisaun físku ai nian, hodi labele difikulta empresa/ema sira ne'ebe atu sosa;
4. Rekomenda ba ministériu, ba futuru aumenta tan pessoal veternaria ba iha munisípiu Covalima hodi bele atende hotu ba iha postu administrativu sira;
5. Rekomenda ba ministeriu, ba futuru aumenta tan pessoal quarentina ba iha postu integradu fronteira mota Masin, Fatumea no Fatululi, tanba iha deit pessoal nain hat;
6. Rekomenda ba ministériu, atu hanoin oinsa mak ba futuru bele buka merkadu ba fan batar, tanba iha munisípiu Covalima produsaun batar sae maka'as;

Komisaun Ekonomia no Dezenvolvimentu

7. Rekomenda ba ministériu, atu apoiu material ba peskador sira iha Suai Loro hanesan konselador hodi nune'e bele konserva ikan, kuandu sosa la hotu, nune'e mos apoiu ro'o peska bo'ot hodi nune'e sira bele halo peska ba to'o tasi klaran;
8. Rekomenda ba ministériu, atu kordena ho ministériu kompetente hodi halo approximasaun ho governu Indonesia atu nune'e bele iha konkordansia ba malu hodi bele reativa fali atividade exportasaun no importasaun karau;

Ministeriu Turismu, Komersiu no Indústria

9. Rekomenda ba ministériu, atu hadia facilidade sira ne'ebe at hanesan haris fatin, sentina no eletricidade, nune'e mos kanalizasaun be'e mos ba iha merkadu fronteira mota Masin hodi nune'e bele funsiona fila fali, tanba husik hela abandonadu durante tempu naruk;
10. Rekomenda ba ministériu, ba futuru hadia diak liu tan fatin turismu iha Suai Loro, inklui ho saneamento, tanba iha neba iha ona uma baraka oan balun ne'ebe komunidade sira utiliza ba fa'an aihan hanesa katupa, ikan no seluk tan, maibe sei falta saneamento;
11. Rekomenda ba ministériu, ba futuru tau iha planu orsamentu hodi hadia facilidade sira ne'ebe sei falta iha merkadu foun Suai, hanesan saneamento, electricidade no estrada tama no sai;

Ministeriu Petroleo no Rekursus Minerais

12. Rekomenda ba ministériu, atu halo kordenasaun diak ho autoridade lokal, lian nain no komunidade sira iha suku Suai Loro, kona ba fatin/rai ne'ebe mak kompanhia Timor Resourch atu hari'i armagem kompanhia, tanba rai ne'ebe pertence ba populasaun tomak suku Suai Loro, no wainhira atu halo cerimónia ritual ruma sira utiliza fatin refere.

Sekretariu Estadu Formasaun Profissional no Empregu

13. Rekomenda ba sekretariu estadu, atu kontinua tau matan no apoiu nafatin ba sentru formasaun rua ne'ebe mak akreditadu, atu nune'e sira nia atividade formasaun bele lao nafatin;
14. Rekomenda ba sekretariu estadu, atu tau iha planu orsamentu operasional ba iha munisípiu hodi nune'e labele difikulta sira nia servisu iha terenu, nune'e mos husu atu hadia edeficio SEFOPE munisípiu Covalima ne'ebe mak hetan estragus iha tinan 2017 to'o agora seidauk hadia;

Komisaun Ekonomia no Dezenvolvimentu

Sekretariu Estadu Ambiente

15. Rekomenda ba sekretariu estadu, atu kordena ho empresa ne'ebé mak responsável ba auto estrada hodi bele kuda fali ai oan rumá, hodi nune'e bele proteze ba iha rai sira ne'ebé uluk ke'e/koa sai hodi halo auto estrada;

Sekretariu Estadu Koperativa

16. Rekomenda ba sekretariu estadu, ba oin atu kontinua implementa programa kuda batar ainaruk (sorgum), tenki involve diresaun agrikultura, tanba sira mak konhese no hatene rai nia bokur no oinsa mak atu kuda, no iha parte seluk antes atu implementa programa ida ne'e tenki iha konhesimentu ba autoridade lokal;

Komisaun A (Assuntos Constitucionais no Justiça)

17. Rekomenda ba komisaun A hodi kanaliza informasaun ba Sekretariu Estadu Terras no Propriedades atu revê fali dadus levantamentu rai husi SNC (Serviço Nacional Cadastros) ne'ebé mak halo tiha ona, tanba rai abandonadu sira ne'ebé iha munisípiu Covalima kuaze iha hotu ona nain no ba oin governu atu halo dezenvolvimentu rumá tenki halo kompensasaun.

V. APROVASAUN

Relatóriu ne'e, hetan ona aprovasaun liu husi reuniaun ordinariu komisaun nian ne'ebé realiza iha loron quinta-feira, 4 Julhu 2019, tuku 11, Oras Timor Lorosa'e, iha sala Komisaun D Parlamentu Nasional. Prosesu aprovasaun hetan partisipasaun husi membrus komisaun nain 5 ho rezultadu aprovasaun a favor 5 kontra 0 no abstensaun 0. Ho nune'e relatoriu fiskalizasaun ba munisípiu Covalima aprovadu ho unanimidade.

VI. LIAN IKUS

Ida ne'e mak relatório vizita fiskalizasaun Komisaun Ekonomia no Dezenvolvimentu iha munisípiu Covalima no husu autoridade kompetente atu konsidera relatório ne'e.

Obrigadu.

Prezidente Komisaun,

Relatora,

Deputada Virgínia Ana Belo

Deputada Olinda Guterres